

新增 乾隆三十六年十一月二十五日

勅命

奉

天承運

皇帝制曰德厚流光溯淵源之自始功多延賞錫
褒寵以攸宜應沛殊施用揚前烈爾耿述舜乃
正白旗蒙古漢藍翎侍衛加一級耿佩誠之祖
父性資醇茂行誼恪純啟門祚之繁昌華簪衍
慶廓韜鈴之緒業奕葉揚休鉅典式逢崇階宜

陟茲以覃恩貤贈爾爲武畧郎正白旗蒙古漢
藍翎侍衛加一級錫之勅命於戲三世聲華實
人倫之盛事五章服采洵天室之隆恩顯命其
承令名永荷

制曰天朝行慶必推本於前徽家世貽謀遂承休
於再世爰章宜錫寵命載揚爾劉氏乃正白旗
蒙古漢藍翎侍衛加一級耿佩誠之祖母壺範
示型母儀著績惠風肆好旣比德於玗璠餘慶
綿延自邀恩於翟芾特頒渥典用表芳規茲以

覃恩賜贈爾爲宜人於戲緩帶輕裘挺孫枝之
材武高文典册賜大母之顯榮祇服寵纓永昭
良軌 乾隆三十六年十一月二十五日
奉

天承運

皇帝制曰聖神威武固資宣力之臣敷錫寵光用
表推恩之典爾耿履中乃正白旗蒙古漢藍翎
侍衛加一級耿佩誠之父躬修克恭庭訓時勤
門祚開祥早授豹韜之業天家有慶聿頒鸞彩

之書茲以覃恩贈爾爲武畧郎正白旗蒙古漢
藍翎侍衛加一級錫之勅命於戲義方懋著其
教思果堪負荷休命用酌其詒穀慰爾劬勞
制曰王事宣勞每興懷於將母王廷沛澤爰錫類
於榮親爾范氏乃正白旗蒙古漢藍翎侍衛加
一級耿佩誠之母克修壺則聿著母儀教子矢
忠藎之忱懋螯增采酬庸本庭幃之訓綸綍生
光茲以覃恩贈爾爲宜人於戲際燕喜之昌期
寧忘國命受鸞翔之典冊永振家聲

新增

藝文

元明善

侍講學士

○大元贈中憲大夫中書兵部侍郎上騎都尉清
河郡伯張公墓碑銘

有序

亞中大夫兩淮都轉鹽運使張君既護其母太
君之柩歸成武遣其子大都護椽晉告其友御
史中丞王公毅曰茲卜吉今年三月將塋先公
於法得樹石紀世紀石必篤於文者足傳永遠
而元翰林我友也尙圖之中丞偕晉持事來以

明善於中丞於運使而不得謝不能謹按其狀
曰公諱成世爲濟甯之虞城人考諱平嘗仕金
爲大河掃軍長河決害兩壩民有防塞功民甚
頌之金滅北徙豐徙雲徙隆興徙聖徙懷來數
年圖歸虞城三遷至成武依母黨遂爲邑人春
秋六十有四卒歲甲寅之五月十有七日也妣
孟夫人嚴毅有家範教子一必於孝言立於一
門而化逮於族姻夫婦南北遷徙備嘗艱苦及
軍長卒旣殯語子林曰而張氏世塋虞城大義

里必塋而父於是林歸求大義營不可復塋西
得地待賓里乃克塋使林居虞城後林卒人曰
哀必傷其母孟夫人哭之曰而死天也吾天平
奚怨政淚爾如河奚益遂不哭春秋九十有三
平辛巳臘月二十三日也合塋待賓之墓二子
長卽林次卽公公樸茂尙質不出一妄語其應
世也不諂貴人不狎邇子唯恕唯恭少老一致
劬躬敏藝日以饒羨窘不能自濟輒輸所有濟
之貸母錢者或子與母等審不能償卽舉券於

火嗜德徇義以訖於終疾病戒諸子曰虞城先
罷兄之息實克守茲成武也業自父母手矧吾
食其間以生脫死吾魂魄亦不忍它而塋我於
是卒於乙未二月廿有二日春秋六十有七後
十有八年爲至大四年用子恩制贈中憲大夫
中書兵部侍郎上騎都尉清河郡伯夫人魚臺
趙氏婦德婦工甚與公宜封清河郡太君甲寅
正月四日卒於京師春秋八十有三合塋成武
之小房里時乙卯之三月甲子也塋禮始具公

男子四人長曰孜卽運使次敏敬運使爲浙江
行省都事入爲戶部主事中書省左司都事遷
員外郎參議樞密院事戶部侍郎出使兩淮靜
重廉畏有制劇才奕奕大用而爲太君哀三年
唯祭事得云女子一人適孟氏男孫十人震泰
晉升恒益復渙願鼎女孫十三人皆適令族乃
爲銘銘曰維昔之微我道不卑維今之暉世德
不違彼務高騰以走時妍哭而飛天墜而沈淵
顧安於田我後爾先爾我之謙我亦汝憐于嗟

平公孰謂

爵于躬。生榮則同。孰克有子。

誕受帝祉。旣溥旣將。駿惠益張。高閣揚揚。邑

光言邁。房里有公墳。瘞德永存。存則道尊。

蕭蕭白楊。亦有楸松。翁仲是守。百祀其從。胡

詩。慰子孝思。庸詔來者。式是法辭。

延祐二年歲次乙卯三月

舊志失載。光緒十九年。知縣熊澤薌因公出鄉。鄉人呈此稿。今補錄於此。

耿都諫

諱

大烈

字

承武德惠碑

昔魯穆叔公之論三不朽曰太上立德其次立功其次立言然有德者其行端行端者功自著有德者其心正心正者言自彰若是乎功之所垂言之所發莫非德之所見也夫德者蘊之於心備之於身固非言之所能名也故以之立朝則霖雨天下以之在野則澤流桑梓其生也惠及當世其沒也愛留人心千百世下聞其風者猶將流連慨想之况身親沐浴其德者乎吾邑

都諫耿公科第世家生而端方當其初掇巍科而家居也填黃堦壩河工緊急公卽力陳於當事民無擾累而事獲終濟雍正四年秋待賓寺河漲大堤已潰護堤幾決公率數百夫黑夜冒雨而往極力壅堵而邑之人得以無恙是其德澤之及人當匡居時已見矣迨後由郎擢臺端轉諫垣利無不興弊無不革一時有鐵面冰心之目焉吾儕鄉民亦未能厯道其詳也及抽簪歸里栽花種竹以娛餘年而於生民之

休戚又未嘗不在念。乾隆六年開挖馬家坊河，
引流而北。時邑侯初蒞，虞詢訪舊例，咸云：「虞事
也，應以虞民。」公獨極言利弊，反覆詳明，乃僱
夫以成大工。其惜民力也。又如此。先是乾隆五
年霖雨爲災，至春月糧價騰貴。公輸金數百
爲闔邑倡，減價平糶，窮民賴以存活。是以十一
年災，仍準故事而行。時公已沒，而其嗣體先
人之志，復捐金以助之。是虞之人民不但食其
德於前，而且沐其澤於身後矣。嗚乎！公之德

不能殫此數端。公德無非功言無非德。又何必分德與功與言而三之哉。古所稱鄉先生沒可祭於社者。非公其誰歟。今公已往。恨不能長留於世。以爲吾民福。然德之在人耳目。固已彰彰若是。豈身被之而反忘之也耶。爰勒諸石。以垂不朽。并誌姓名。以示共相感德意云。時乾隆十三年閏邑鄉民立。

重修奎星樓記

龔一發

知縣

傳曰。有其舉之。莫敢廢也。况克合乎興賢育才。

之意而不涉於迎祥邀福之謀。尤創建之所必
及。而爲有司所時宜修葺者乎。余蒞虞三年。於
城東南隅。見有巋然曰奎樓者。志傳邑紳許士
正等移建於此。而邑中科第遂盛。夫科第盛於
人文。豈崇建奎樓。遂能致茲祥乎。然堪輿家往
往有是說。粵考奎在西方。爲二十八宿之一。祭
法幽宗。與五宮夜明同列祀典。奎星古有成
文矣。又孝經援神契云。奎主文昌。春秋合誠圖
云。奎主武庫。我國家至治光昭。英賢蔚起。開

文武兩科以造士。天下郡縣學校修舉外，率自奎閣及文昌宮，是亦欲興育賢才，使科甲聯翩鵲起也。茲樓歷有年所，漸以破壞。而是年爲鄉試之年，予懼士之頻年困於災祲，無以鼓其志氣而振其耳目也，因捐爲多士倡修，亦鼓舞之一端與。榜揭，邑中領鄉薦者文三、武二，邑人士以爲是宜記以垂後，故記之。吾嘗讀易曰：自天祐之吉，无不利。子曰：祐者助也。天之所助者順也。人之所助者信也。履信思乎順，文以尙